

張劍 張燕嬰整理

莫友芝全集

第十一冊

中華書局

張劍 張燕嬰 整理

莫友芝全集

第十一冊

中華書局

黔詩紀略卷之二十二

節愍盧布政安世二首一

安世，字環水，赤水衛人。爲諸生時，與烏撒衛諸生劉鎮藩皆好談兵，尚意氣，稱莫逆交。環水舉萬曆四十年（一六一二）鄉試，爲富順教諭。天啟初，奢崇明反，遣賊逼取縣印，署令者棄城走。環水收印，率壯士擊斬賊。無何，賊數萬猝至，環水單騎鬪，手馘數人，詣上官請兵，復其城。《省志》云：安世任巴縣學博。奢賊掠城邑，令死之。安世鼓集義勇，誘賊渠孟竇山人城，斬首持示，賊驚潰，掩殺無算。與《史》不同，不知是一事是二事。帝用大學士孫承宗言，超擢僉事，監軍討賊，屢戰有功。四年（一六二四），以師復遵義。遵義自辛酉（一六二二）秋末，

〔一〕按實收三首。

奢酋遣逆目扶國棟陷之，遣奢應周破桐梓，知縣洪維翰、典史黃啟鳴死焉。《史·張振德傳》云：維翰、啟鳴，遵義知縣、典史。依《郡縣志》（《志》「翰」又作「幹」）：賊破桐梓，維翰坐縣堂罵不屈，賊索印，曰：「印在喉下。」索銀，曰：「銀在喉下。」色甚厲，賊義之，不敢辱。詣虎峰崇德廟，作《來桐記》，題詩於柱，末云：「憾乏張巡相拒力，願爲厲鬼殺崇明！」遂自經，僕從死者數人。播州遺孽皆起相附，屬州縣亦不保。貴州巡撫李燧遣總兵官張彥方、都司許成名、黃運清等，以十二月復之。明年（一六二二）復陷。推官馮鳳雛等又死。見《朱燮元》及《張振德傳》。七月，安賊復遣酋來攻城，恣意擄掠去。明年（一六二三），四川總督朱燮元既拔藺巢，環水與蜀將侯良柱、陳一龍、秦衍祚等亦克遵義。環水、良柱、一龍留遵巡守。而奢崇明父子竄水西借兵。安邦彥復以一軍來窺，破走之。不使渡渭河，乃分兵屯壘以省川運。明年（一六二四）春，黔撫王三善敗沒於大方。水賊勢張甚，四出焚掠。遵義地荒人絕，千里無煙。環水招撫流移，搜剿佚賊，於是乃盡復遵義地。五年（一六二五）三月，以燮元總督雲、貴、川、湖、廣西軍務，駐遵義，辦安賊。四月，燮元上言：「自遵義五路進兵，永寧破巢之後，大小數百戰，擒獲幾四萬人，降賊將百三十四人，招撫群賊及土、漢、苗仲二十九萬二千二百餘人。皆監司李仙品、劉可訓、鄭朝棟及安世等功，武將則林兆鼎、秦翼明、羅乾象，土官則陳治安、邱紹文、悅先民等。」帝

納之。進環水貴州右參議，遷四川副使、遵義監軍。而環水自復遵義，即於瀕水西之沙崖、古樓、鎮南、底水、中澤、烏江、茶山、羊崖、板角等十三隘，上九隘外，舊《志》又有黎民、吳馬口二隘，其二隘未聞。自西而南而東，揀同復遵義之鄭益顯、聶文啟、張奏凱、周正、陳王謨、袁鏊、王尚明、劉臣武等分兵防守，尤重沙崖，常以參游任之。益顯，江西吉水生員。官至四川遊擊。解職居富順，助環水復其城，又同復遵義。至是以遊擊防底水隘，遂家於遵。正、尚明、臣武並遵義人。尚明曾以千總從劉綎於蜀，至是授□□。臣武授守備。正援遼總兵世祿子，以萬曆戊午（一六一八）武舉，官參將。其所領隘未聞。六年（一六一六），燮元得以誘殺奢寅，撫崇明、邦彥，亦環水隘防助之。燮元憂去，賊復熾，終不敢逾遵義一步。崇禎元年（一六二八），仍起燮元五省總督討賊，乃上環水功，予世蔭武職，進右參政，復留守遵義。明年（一六二九），崇明、邦彥並授首，益嚴隘守以防竊發。招徠植養，四民熙熙復業，各有安宇。五年（一六三二），水酋小烏安祚遠率部酋趙國政獻渭河水下西岸地，環水納之。請建馬場爲懷遠衛，拓遵土，即以祚遠、國政爲衛官。未幾，請告歸。十二年（一六三九）正月，妖人張道興以數千人用魔術亂遵義，隘官文啟擒斬之。祚遠死，懷遠地爲水西所奪，其酋郭士奇等襲殺國政繫獄。十五年（一六四二）四月，士奇黨以衆犯城，鄉勇頭目王選、王之琴、冉國柱禦之，戰死，遂害遵義知縣王佐

聖字克仲，長洲人。乾隆中通謚節愍。隘官益顯、尚明聞變，捲甲赴援，殲賊數千人，境內得無事。時環水歸已久，遵人猶頌其置隘功云。張獻忠入四川，乃起環水四川兵備參議監軍。十七年（一六四四）赴援成都，比至，而省城已陷，被執不屈死。鎮藩時爲總兵官，鎮四川，亦赴水死。福王時贈環水布政使。

鎮藩，字屏山，以生員襲千戶，從軍授官，征奢、安，經數十戰，皆有功。洊升至副總兵。崇禎中，水西納土，總督燮元經理其地，築大方、水西、比那三城，各以重將鎮壓之。於是方國安守大方，袁桂芳守水西，而鎮藩守比那。未幾，土目沙化作亂，三城盡棄。鎮藩等咸還貴陽。頃之，遷總兵官，鎮貴州，旋移四川。十七年（一六四四）八月，獻賊逼成都，鎮藩禦之，敗還。賊穴城，實以火藥；又剝大木長數丈者，貯火藥，合之，纏以帛，植向城樓。鎮藩與巡按御史厲衆奮擊賊，却二三里，咸喜，以爲將去也。九日黎明，火發，北樓陷，木石飛蔽天，守陴者皆散，賊遂入城。鎮藩突圍出，赴浣花溪死。《明史》，環水、屏山，附見《朱燮元》、《劉之勃》兩傳。

張奏凱，桐梓縣人。《川志》云綦江人。以天啟四年（一六二四）復播功，授遊擊。崇禎中

升川北副總兵，以拒李賊功，晉天柱總兵。獻賊至成都，奏凱守東門，城陷死。

良柱，字朝石，亦桐梓人。《史》云永寧衛人，《殉節錄》云叙南衛人，皆就其官地書之也。天啟初累

官四川副總兵。六年（一六二六）晉總兵官，鎮永寧。崇禎二年（一六二九），賊據五峰山桃紅壩。良柱乘賊不備，與副將鄧玘侵早霧迫賊潰之，追奔至鵝項嶺，徑長而陜，人馬不能容，蹙死賊數萬人，崇明、邦彥皆就擒，傳首九邊，時稱西南奇捷。燮元上功不及良柱，至相訐奏，解良柱職候勘。久之，撫按及他御史爭上其功狀。七年（一六三四），始進左都督，世蔭錦衣指揮僉事，尋復充四川總兵官。十年（一六三七）十月，李自成、過天星、混天星等陷寧羌，分三道入寇。良柱拒戰於綿州，衆寡不敵，死之。賊遂直逼成都，追奪良柱官。越三年（一六四〇），其子指揮天錫請殺賊雪父耻，授遊擊。天錫剽悍敢戰，帝嘉之，進一秩，復其父官。事詳《明史》本傳。

王模，遵義縣人，總兵一龍子。崇禎中任四川撫標中軍參將，亦十年（一六三七）冬，流寇自陝陷蜀，血戰死。《殉節錄》以爲崇禎末，蓋未審。事聞，附祀忠臣廟，官其弟王政千戶。

文啟，字紹江。其先豹封襲重慶內衛官，蓋籍富順。至文啟從環水復富順，又復遵

義，遂舉族來居。爲中澤隘參游者十餘年，最有名。張賊之敗死也，賊將馬寶竄入遵，畏其威，計圖之，招飲桃源洞。妻石請設備，拂髯曰：「孺子何能爲？」携子世昌單騎至，喻以大義，聲色厲切。酒中伏甲起，父子並遇害，隨行犬帶血還，嗥於門，石驚曰：「事變矣！」孫思聖方晬，抱匿藝林，祝曰：「聶不絕，兒不啼。」俄寶至，屠其家，收其軍籍。兒果不啼，鄰人拾而養之。其祖母亦逃免。後數歲求得兒，贖歸，生彪，爲諸生。今郡南五十里三望田將臺下猶有文啟手植桂，即中澤鎮址云。先是，崇禎十三年（一六四〇），郡人立碑紀文啟平妖事。其先又有碑曰「安攘」，記環水事，一時以爲實錄。碑詳《府志》。

乾隆中，賜環水、王謨、鎮藩，並謚節愍，良柱忠烈，奏凱烈愍。文啟以川、貴《志》失載，不得謚。

書羅政卿自叙後示其裔

能以兵威服遠州，烏江赤水咄嗟收。文章欲變蠻夷俗，忠孝長貽孫子謀。尺地遽非楊氏守，同知猶與衛官留。太原一樣開疆祖，保世綿長自有由。

按：播州宣慰楊氏始祖端，宣慰同知羅氏始祖榮，並唐太原人。榮字政卿，以大曆七年（七七二）開播，世侯其地，封六州都督沿邊招討使、太子太保、榮祿大夫。後百五年爲乾符三年（八七六），榮元孫太汪幼襲不能守，請於朝，命端復之，遂共有播土。楊氏滅，羅氏復襲威遠衛指揮者數十年。榮居播建堂曰「忠愛」，自爲《序》。端復爲太汪序其譜，見《羅氏家乘》。爲《全唐文》未收者，附錄於此。

唐羅榮自《叙》：余本太原人也。胡爲而播人也哉？播州，古夜郎地也。自生民以來，長山深箐，彝種叢居，儵叛儵臣，時征時討。秦始皇之法莫格，漢帝之教難繩。蔡經略三戰而無功，何司馬九爭而敗績。信哉西蜀之巨寇，誠哉累朝之眼丁。余初奉命麻陽，分符巴士，屢專征伐，數建奇勳。天子命我征彼鬼方，仗劍一呼，爰整師旅。蒐桓趙之猛才，集哲謀之善士。風聲響應，如雲如雨。倣方叔之南征，倣渤海之北伐。鑿山開道，剿撫並行。如趙營平之屯湟中，寇恂之治長社。渠魁十八惡，顯就梟擒；爪牙八萬人，翕來歸化。從前椎魯之域，今變文物之區。關土開疆之業，亦庶乎其盛矣。繇是歷鎮七載，長官安撫，棋置星羅，編戶立差，釐然畫一。嗟乎！費十年汗馬之勞，開千載難平之寇。功成身苦，臣志惟疏表請還鄉，願終骸骨。天子曰：「夜郎之地，累代荆榛，拓土開疆，功力卓顯，俾爾世侯斯土以酬爾勳。仍賜爾鐵券一道，子孫世守。」斯時也，功著旂常，祿延苗裔，荷天之休，亦孔之碩矣。雖然，創業固難，守成亦不易。倘非世德、世功、世忠、世孝，難守有道之長。是以君子貴乎善繼述也。余今年七十有六，來鎮茲土二十有七年。後之帶礪山河與國同其休戚者，皆自余今日始。嗚呼！亦可以覽之而興忠孝之思矣。唐貞元十四年（七八九）正月望日。

唐楊端《羅氏忠愛堂譜序》：蓋聞豪傑之挺生，莫大乎盡忠盡孝二者而已。故先民有言：「求忠臣必先孝子之門。」又云：「事親孝，則忠可移於君。」吾於是而知君家忠與孝之大也。粵稽古載，君之先宗，出於春秋有熊氏。君之先子、先大父，登將相縉紳。本大則枝盛，源深則流長，理固然也。及大曆初，君之先公太保公值國步之多艱，抱命世之才略，著聲三楚，建績八閩。王室賴之以安，妖氛需之以靖。夜郎濁亂，天子震驚。推轂掌戎，廓清播土，分符割壤，世受侯封。所謂非常之功必待非常之人而成者，君之太保公是也。及君之世，歷祀百年，傳家四葉。冲年嗣服，遺大投艱。播孽之遺類復猖，牂柯之殘魔復崇，封疆之孤注難支，君其見幾明決，思患未然，因而有太王之遷，子胥之去。修車馬，繕甲兵，卧薪嘗膽，復少康之業，報吳越之仇。其始也，我出我車，與子同袍。其終也，執訊獲醜，與子同僚。猗歟！幸哉！向之先公創而造者，君得以恢而復也；君之恢而復者，又吾之得以創而造也。先後濟美，伯仲壘簾。其與君之螽斯、麟趾，享茅胙之長、帶礪之久者，並日月而弗朽矣。一日登君之堂，閱君之《譜》，見先公遺言，如覩先公手澤，其德業聞望，凜凜筆端，猶令人心懷念慕，繼繼莫釋，一唱而三歎焉。因忘鄙陋，勒爲俚詞，附之仙《譜》，聊慶其盛云。乾符三年（八七六）冬十月。

奢夫人

都督持威太自輕，翻令順德據聲名。君看九驛奢香路，豈直宜娘解用兵。

按：奢香，貴州宣慰使霽翠妻。翠死，香代襲，總其衆。都司馬煜欲郡縣香管地，裸撻香，冀激諸羅啟兵端，乃

因平之。宣慰同知宋欽妻劉淑貞止諸羅無動，馳見太祖，爲香訟冤。香亦尋入朝自陳。太祖爲誅煜以謝，諭香曰：「何以報朕？」香請開四鄙，世世保境。帝大悅，封香順德夫人，厚賚遣還。香遂開偏橋、水東以達烏蒙、烏撒，立龍場等九驛，貴州入蜀之間道以通。九驛者，威清在龍場，陸廣在貴陽境，谷里、水西、西溪、金鷄、閣鴉、歸化在大定境，遂達畢節。《方輿紀要》：金鷄東五十里即奢香驛。《黔西志》云：西溪即奢香驛也。

宜娘，宋黃平府人，有武略。今黃平舊州南五里有宜娘山，頂平，可容萬人，有壘址，傳爲宜娘屯兵處。

《方輿紀要》：奢香驛在貴陽府西北二百六十里。香開貴州東北道以通蜀、烏蒙，立龍場九驛，故驛因以名。又水西驛在奢香驛東五十里，即陸廣驛也。引《志》云：自奢香驛而西北，又經金鷄、閣鴉、歸化三驛，而至畢節驛，去府城四百二十里。又云：龍場驛在府西北五十五里。西五十五里即陸廣驛也。又威清驛在府西北四十里。

《貴州通志》：值水西有阿列之酋。谷里有阿古之酋、白歸之酋、白縱之酋、阿扯之酋。威清有阿捕之酋。奢香有沙遮之酋、阿日之酋。陸廣有阿列之酋、阿虐之酋、普也妻之酋。金鷄有阿遂之酋。久充諸驛馬，皆前後散去，安國亨急爲舉廢，驛騎盡復。

贈楊生

楊氏多賢守土良，上承元宋肇於唐。一朝逆節干天怒，千里侯封戰血荒。有德何須頻設險，佳兵自古不爲祥。年來漸被詩書澤，好引弦歌滿夜郎。

環水有《楊氏譜序》云：「遵義，古夜郎也。厥邑險巖，易亂而難治，詎非束手之事乎。然亦未嘗深察習俗之宜也。余於莅任之始，每從公餘詢諸父老，訪庠中俊秀，欲求便民養兵之法，靖而安之，俾邊隙杜野處寧。適有楊生獻厥奇略，爲予借箸，予甚嘉之。越年餘，烽煙漸息，人物頓安。生從予登龍山眺湘水，予曰：「快樂哉，山水之固乎！」生愀然曰：「在德不在險也。」予曰：「何以言之？」生曰：「予家自始祖端，世守茲土，因爽厥德，遂削平焉。不然，公焉得茲土而莅之？」予聞是說，始慨然曰：「爾固楊侯子孫乎？胸中甲兵，志氣卓犖，亦云無忝祖德矣。」次日，生持《族譜》謁予爲《序》。予維楊氏之蕃，肇自唐，衍於宋、元，及於我明，雖當零落之後，而厥族猶彬彬蔚起，以文化武，以治易亂，不恃險阻，從法約束，亦可謂世胄之子孫。識時務，知興衰，挽習俗而還大雅者矣。天啟丙寅（一六二六）。

烈愍譚郎中先哲一首

先哲，字光美，平壩衛人，舉萬曆四十年（一六一二）鄉試，累官戶部郎中。時事利弊，多所陳疏。律己矜慎，不可少干以私。告歸十餘年，一以植人材、維風教爲己任。自甲申（一六四四）明亡，福、唐、桂三藩相繼稱號，貴州尚未入大清版圖。流賊張獻忠據蜀僭號，

以孫可望爲軍師，既而疑之，改爲平東將軍。而以李定國、劉文秀、艾能奇爲安西、撫南、定北三將軍陰制之。獻忠屠蜀人幾盡，漸及其兵將，可望等懼，適獻忠中流矢死，丁亥（一六四七）正月率其衆破遵義，奔貴州，入據貴陽城，官民紛紛逃避，賊黨四路搜捕，威清、平壩、龍里、新添之間，殺戮無算。二月攻陷定番州，屠之。三月大清兵西征至遵義，可望聞風屠貴陽城西遁，連陷所過城邑，屠鎮寧、安南、普安以入滇。伏屍千里，鷄犬無聲。光美聞賊逼境，率衆走保衛東長沖圍避之。賊大至，度衆寡不敵，率家人南向拜永曆君，嚼指血書數語寄弟先召。圍遂破。光美及妻劉俱被執，罵賊不屈，遇害，舉家若干口同殉焉。惟子瑄在先召所，得不死。光美屍與劉屍相枕藉月餘，顏色不變，見者莫不哀異。先召合葬之衛西蝦蟆關側，人呼爲「雙節墓」。長沖有石坪，今猶傳爲光美夫婦臨死時拜闕石也。《明史》附見《忠義·張耀傳》。大清乾隆中賜謚烈愍。當是時，平壩以鄉官禦賊死者，復有石聲和、張守和，貴陽則有劉瑄、吳子騏、楊元瀛、李公門、李世甲諸人，修文則有陳富，威清則有蔣勸善，安南則有張一熊，安莊則有伍右文，定番則有尹思民、顧人龍諸人；其以校職死者，則普安張珣；其以衛職死者，則安南尋鼎，貴州蔣薦，鎮遠黃祚承諸人；以

土官死者，則有韋番、韋帝臣、程番、程民悅諸人。思民、勸善自有傳。人龍、薦、帝臣、民悅皆附見思民下。瑄，字子佩，萬曆三十四年（一六〇六）舉人。崇禎中累官南戶部主事，以剛直齟齬辭歸。可望陷貴陽，瑄與子騏、元瀛、世甲及貴陽貢生蔡紹周、胡修超（一作起）、王孫齊等共團鄉兵於威清，扼賊於滴澄橋，屢敗之。賊大至，衆寡不敵，俱被執，不屈死。元瀛，字蓬山，天啟元年舉人，官同知。公門，萬曆四十六年（一六一八）舉人，官陝西分巡關西副使。世甲，萬曆二十五年（一五九七）舉人，官知州。子騏，爲光美同年舉人，別見其子中蕃傳。富，字君幅，以勇力著稱，官至副總兵，曾調援遼，以安賊起徵還，遂自京師齎巡撫印馳援王三善於湖廣，從復貴陽城。崇禎二年（一六二九），擒斬安邦彥。三年（一六三〇），從鄧玘勤王，皆有功。以老乞解官，居州之扯泥堡。丁亥年（一六四七），孫可望南犯至扯泥，富率鄉勇禦之，衆寡不敵遇害，一家死者百餘人。子良輔，積功至副總兵，鎮定廣。艾能奇犯定番，良輔率兵禦之於青崖長田，戰弗利，退保定番，城破戰死。（富戰功詳《貴陽新志》。）聲和，天啟七年（一六二七）舉人，歷官寧前道兵備參議（方《志》作「政」）。曾監軍遼薊，至是致仕家居。聞流賊至，率衆保栽秧寨圍。賊衆攻圍，親冒矢石禦之。會大風起，賊四面縱火，圍不守，聲和與子生員吉舉家數十口及村民千餘皆死焉。其兄弟貢生聲正之女，年二十，賊悅其少艾，立危崖上，罵賊投崖，死尤烈。守和，魁偉有膽略，官柔遠營守備。丁亥（一六四七）春，衛城不守，與駐平壩之安順同知朱由棟（宗室，常德府人）率衆保李子山（在安平縣南十里，今呼爲穎子山）。二月十四日，寇清晨至，礮石如雨，兩關並下，守和度不能支，自殺其妻子家屬，揮大刀連斫數十賊，力盡而死。士民萬餘人，由棟舉家五十口皆同死。珣，鎮遠人，授普安訓導。賊至逼授僞職，罵而死。尋鼎之

先有達者，南直定遠人，以功世安南衛指揮。其後有治本者，爲衛指揮。崇禎十二年（一六三九），征毛口六墜叛苗，迷道失利，與衛鎮撫余維敬皆力戰死。鼎嗣治本爲掌印指揮。丁亥（一六四七）春，孫賊來攻時，永寧州亦寄安南城，鼎與知州榮昌曾異撰、衛訓導黃元正及異撰客江津進士程玉成、貢生龔茂勳謀曰：「衛據盤江天險，控拒全黔，棄之不守，事不可爲矣。」相率登陴，督兵民拒守。逾一月，糧盡城陷，皆死之。衛人死者無算。可知者，惟歲貢張一熊、廩生宋懋功。一熊，謁選除通判，以親老不就，母卒，哭幾喪明，事父益篤，至是父子同遇難。懋功，事孀母鄧至八十餘，盡其歡。賊至，負母奔避，遇害於途。衛沙營司陸朝士求得異撰骨葬衛東門外，以鼎、元正及諸鋒鏑死者焚之祔焉。（後又移異撰葬江家園，亦以鼎、元正祔，見王民新《曾公神道記》。《記》又謂，與曾同死者有奉使經過之兵部職方郎中陳公，不知與《史》載之程玉成爲一人爲二人也。乾隆中進謚異撰烈愍，祀忠義。）祔承，鎮遠衛千戶，寇陷黔被執，不屈死。而龍里衛人禦流寇力戰死者，猶聞有黃應祺、李世珍、朱紹文、周應淇、羅繼善，皆不詳其爵。右文，天啟七年（一六二七）舉人。官參議，致仕。賊圍鎮寧，率衆拒守，城破被屠死。普安、新添死者無可考。勝朝《殉節諸臣錄》載入祠士民有楊興旺，永寧人，獻賊餘黨據永城，被執，罵賊見殺，闔門遇害。見《川志》，當亦在其時。先是，公安嚴俊，號冷水者，博通經史，精天文，居平壩數年，衛諸生多從之遊。後寓偏橋雲臺、西華諸山，從者益衆。一日，指日邊星問諸生，對曰：「豈太白晝見耶？」曰：「非也。此名天狗。漢七國之變，此星晝見。今復見，西南不可居矣。」遂飄然不知所往。未幾，而奢、安之亂作，既而張賊亂蜀，其黨餘焰波及貴州，當之者幾無噍類。其所經過，唯遵義一郡幸免屠戮，而賊行後，即感奇疫，至十室無一存，不知蒼蒼者何心，而故爲此慘毒邪！

抑疾風勁草，藉以維風教邪！《黔中舊記》闕略。當時致命諸人猶可考見，不過百一之存，故比而書之，以作山國忠義之氣。

乾隆中，聲和、瑄、元瀛，公門、世甲，並通謚節愍。（聲和、瑄、元瀛及異撰，《史》並附見《張耀傳》。）治本，亦通謚烈愍。紹周、修超、孫齊、吉，並祀忠義祠。守和、富、良輔、維敬、珣、鼎、元正、一熊、懋功、祚承、右文及應祺等五人及陳某，皆《省志》失載，故謚、祠不及。而在孫賊之先，以鄉人保鄉里死事，乾隆中得謚者，復有貴州衛指揮謝某、副總兵開州李科，並通謚烈愍，總兵官開州金鎮貴，通謚節愍。孫賊後死事者，復有徐登高、趙富。謝某，崇禎四年（一六三一），分守貴陽城，賊陷城，被執不屈，支解死。科，十六年（一六四三），白蓮妖賊黃邦民反於湄潭，寇開州、遵義境，科禦之茶山渡，戰沒。鎮貴，本江南人，商於貴陽，安賊叛，括其貲助餉，遂占籍開州。從征積功至總兵。乞致仕。十六年（一六四三），州紳苗叛攻城，鎮貴與知州鄞縣黃家雋、吏目聶禁守城拒戰，城陷，死之。雋及子近袞、近宸、禁並死焉。（之雋（一），乾隆中亦通謚節愍。禁、袞、宸，祀忠義祠。）登高，鎮遠人，官都督同知，鎮平越。孫可望自滇遣白文選陷平越，被執，脅以官，不屈死。富，印江人，思石營把總，戊子張先壁叛，將入印，富守秀實關，報城中令居民速徙曰：「吾以身代群命矣。」於是守關拒賊，援兵不至，被執死之。

光美父泮，字承德，博學知名。萬曆末歲貢，不願仕，以行義率鄉里。形家言東郊形勝，宜建學，泮立割膏腴易

「一」之雋：「之」字疑衍。

其地，成之。天啟初，出己財招募守城禦安賊，而城以全。先後捐金助餉鉅萬計，無吝色。身督教二子，能盡義方。先召自有詩。瑄，本朝康熙中，官工科掌印給事中，請沿邊諸郡官輸米照各省爲常平倉，議准。黔之有積貯，自此始。

長沖囤寄弟語

明社已矣，何有於黔荒？囤存我存，囤亡我亡！與家人相誓以死，亦不負於吾之鄉。唯瑄與弟生死不見，唯弟撫瑄以存一綫。嚙指灑血，血與淚漣。弟乎！瑄乎！他日收吾骨於長沖之原！

節愍蔣郡丞勸善七首

勸善，字夢范，或稱小范，威清衛人。衛今爲清鎮縣。蚤惠，稱奇童，弱冠舉萬曆四十三年（一六一五）鄉試，主司竟陵鍾惺尤賞異於諸生。選孟津知縣。清苦自持，一介不妄取，請蠲民間積逋賦萬餘金，縣人得蘇息。遷河間府同知，以不善逢迎與當道左，遂拂衣歸卧